

寄庵詩文鈔

寄庵詩鈔六 癸亥

寧州劉大紳

韋叔太遺詩題詞

韋生有遺編世人不入目形骸寄空山草稿藏破屋揚  
子徒擬元賈生自賦鵬生死皆可悲不如草與木其友  
石鐵人來自黃河渙再三屬採搜言語忘重複去年辭  
歲時提携始一束我方思故園暫與度敝簾今日天氣  
寒圍爐歎瑟縮展卷未及終窗風起謾謾詩人例多窮  
自難獲厚福盛名胡亦艱天道詎可卜况多懷我詩君

死留我獨我昨聞人言令妻大義篤常恐詩不傳未肯  
容膏沐有婦乃如斯何必子徒讀曹人於友朋豈但相  
徵逐願破黃金囊盡裝白玉軸更歷千百年庶幾有私  
淑吾言非阿諛哽咽不能復

### 雪山

自掃門前三逕雪新添楹底一重山始知無事日皆暇  
便是入官人亦閑沽酒小橋流水外題詩橫嶺側峰閒  
醉中忽訝梅花落盡在清清碧玉灣

### 憶山中梅樹

故山處處梅花樹不到春時花便開今日武陽風雪裏  
誰家驛寄一枝來

雪後赴郡道上

寒雲初散曉烟低誰碎瓊瑤襯馬蹄似恐紅塵無避處  
天公爲築白沙隄

郭家曠飯後

食罷駟車去惟愁雪遽殘如能萬古在何惜一生寒長  
路行將半孤吟興未闌終懷小樓上半醉卷簾看

慰僕

有身同作客所至詎如歸令尙乘羸馬奴宜著敝衣行  
看春色近坐見雪花稀嘖嘖汝何羨幾人輕且肥

途中戲作

不盡行人意愁生落日餘遙望小村舍却似舊山居市  
遠先沽酒春寒更買魚途中得好句草草就燈書

自郡歸值鐵人旋里同宿旅舍

客路忽相見早知君欲回應忘守歲夜始自故鄉來晴  
雪在官柳香風過野梅荒村同一宿明月共徘徊

贈王子文

少年意氣薄儒林漸看風霜兩鬢侵休向生前驚俗目  
要令死後愜人心烏衣家世雲霄近蠶尾詩傳海嶽深  
華胄才名兩無忝好從池北廣搜尋

送子文再赴都中並訊熙甫侍御消息

米貴長安不易居君歸幾日又驅車梁園久著枚臯賦  
漢室新成賈誼書去及春風搖岸柳來當秋雨上河魚  
莫忘尺素先時寄死到西臺語恐虛

哭劉岸淮先生

戕戕天柱一宵傾星殞如雷世盡驚獨對事皆關社稷

退朝人止認書生季孫自學蒼鷹逐伯樂長聽伏驥鳴  
每笑顧廚標榜甚依劉原不是虛聲

我是支離一散人深山草木自爲春微官早信輸屠釣  
盛世重教識鳳麟薦士古來徵閭閻憐才今許到沈淪感  
恩知己均須報已失休休一個臣

野瑾

有生必有死大化無或私嗟來自何所姓名人不知橫  
腰少利劍定非亡命兒亦非諸侯客搜索囊無詩極瘦  
深至骨淺黃微有髭柳筐與木杖委置當路岐春寒不

可耐孰與相扶持暴露竟無主爲主吾何疑王澤及枯  
朽春令先骺骹狐搨固可慮糞食尤可悲丁寧語里正  
爲汝深埋之形骸返泉壤魂氣乘雲螭故鄉有故鬼不  
汝新鬼欺此間詎足戀嘯月空愁思我亦遠遊久振觸  
涕漣漣

### 安南王

阮福映好蠻子長農耐雪先恥滅安南摧朽耳安南亂  
臣如朱五生兒居然亦犬豕摸金發塚校尉中郎丞相  
置之汗國史何況煌煌國王作賊海中豈復有人理一



朝傾國都喪印璽天道福善禍淫固如此阮福映好蠻  
子不敢自私上諸天朝天顏喜天子曰咨  
爾阮福映爾之恭順無與比爾其世世子孫君王安南  
矣國維舊命維新不得復以南越儼臣阮福映崩角稽  
首九拜言願爲天朝不侵不畔之臣以沒齒阮福映  
好蠻子惜哉敗績相公不及見之身早死

鄉園

鄉園夢到夢中疑欲問神龜龜不知病久正經年老候  
愁深是送客歸時板輿自愛花間路行卷休書醉後詩

粗報君恩今廿載小臣何以遂烏私

題漁洋種竹圖

長松百尺覆茅廬中有山人坐讀書忽憶渭濱千畝竹  
分來夜雨曉風初

玉笋門生卽畫師更添一絕是新詩山中正解新簞籜  
誰記劉郎手種時

無田

無田不退已爲貧幸免饑寒住日南五畝園中葵號免  
四圍山下豆名蠶春深雨氣通花徑夜半泉聲入竹庵

豈是此間多種秫年將六十尚華簪

同焦筠軒趙紫山遊官花園

濟陽城外官花園年年車馬如雲屯謝安東山自携妓  
孔融北海頻開樽自謂多情是花王朝逐香風暮隨雨  
纏頭束錦酬清歌脫手千金償妙舞可憐百忙才一閒  
幾時醉臥花陰間玉勒乍嘶芳草逕金衣空囀綠楊灣  
我昔來遊子無偶偃紫倚紅獨舉酒種花人既是紅顏  
看花人亦非白首逡巡老矣猶簪花笑看十里朱簾斜  
倚樓與君共嘯詠驚筵有客同咨嗟日落未落鴉陣返

欲去不去歸路遠壞牆破壁題姓名拂袖籠紗忘恩怨  
再來何日同何人未卜先春還後春但願園丁好護惜  
花枝嬾娜迎車輪

哭王熙甫侍御

每從諫院想儒林下直垂簾自苦吟疏入常關天下計  
詩成時見古人心祇應道路悞傳死何可鬼神真見侵  
他日長安重走馬臺前古栢影森森

至棲霞縣晤牟陌人

我非不識君君非不識我僮僕不相知應門語相左已

是三年別不分一席坐搖鞭太息去馬首爲駭駭君起

見名利立斥僕燕嬉遂忘嫌疑地

時子停縣署

急尋如星火

歡敘平生言喜極淚欲墮重造賢人廬門戶無關鎖著  
書滿屋梁泰岱失嵯峨心精多獨得妙義相印可往往  
笑古人遺大舉叢脞我困風塵中欲行足已跛開卷字  
不識低頭自慙囉看君鼓神勇中流牢把柁亦欲擊棹  
歌長江附巨舸年歲傷老太氣力日衰情況今再出山  
陸沈亦未果槁壤蚓自安繭絲蠶自裹二者孰是非何  
事矜負荷君庭有長松君酒有白墮聽松且飲酒世路

未坎壈

悞入崑崙山中

山中氣味異風塵半日烟霞貯此身本以迷途逢勝地  
遂令忙世有閒人立時便覺仙非遠到處皆嫌畫未真  
一悞不妨還再悞重遊何必武陵春

過一村是崑崙山最勝處

巖岫多奇變環村更不同人非謫天上居豈得山中叢  
樹皆仙木羣羊亦雨工未能停馬足有愧訪崕峒

早行

月落繁星白雞先山鳥鳴居人還後起過客已前行樹  
杪羣峰合雲端一逕橫遠村深谷底數間不知名

捕雛行

捕蝗及海外止宿荒鄉村雞犬寂如水清溪聲到門門  
前綠楊樹餘蔭來短垣野燕哺衆雛巢隱枝葉繁不知  
何童子四五謀樹根忽然陟其末躋捷如猱猿見之恐  
驚墜欲止還舌捫須與衆雛燕探盡無復存雌雄氣力  
弱飛繞求救援下令反若子桀驚喙予昏蝗今滿坑谷  
勢將及周原捕雛不捕蝗二物何怨恩四顧雙野燕空

勞訴煩冤夜半不能寐有語聲欲吞侵晨策馬去此非  
吾邱園

山陽寺僧餉櫻桃

手種朱櫻熟林禽未及知摘當新雨後餉及遠行時飽  
領好風味歸看空樹枝不須誇紫禁赤玉與青絲

望磁山

昔年我將去磁山苦相畱巖洞積冰雪亂舞玉龍虬今  
年我適來未作登山謀蝗蝻滿山谷一日經千搜只解  
捕蝗不登山山神怪我徒煩憂不與雲雨只生蝗我爲



山神亦含羞云何神巫傳神語蝗是神蟲難與仇文棟  
雕梁飾神室不出三日神爲收嗟我捕蝗四十日信如  
巫言復何求早辦蠟屐上山頭

蝗

旣生百穀何生蝗天道於此殊芒芒四其翼且六其足  
無所分子更荒唐初生伏山谷見人尙畏藏繼乃入平  
隴其勢漸猖狂十有八日如蟬蛻輕紗薄翼能飛颺柳  
樹摧殘履底貴鳴金鼎沸旗齊張健兒爭先恥文弱越  
山跨澗同康莊十圍五攻有成法左折右旋無故常用

農卽兵蝗卽賊誓不使賊爲民殃可憐老翁無氣力弱  
孫幼子相扶將凶年徵役不得息十家三四離故鄉我  
聞賢人之境蝗不入蝗之生也無循良方今齊城七十  
二同官大半皆龔黃蝗何爲乎策策而堂堂幾令千里  
無遺糧虎可渡河鱷可徙我欲披髮排帝閭前導飛廉  
退六鵠驚天動地颶風狂火攻下策笑田祖吹入渤海  
歸混茫再沛甘霖及一尺農夫計日收穰穰我亦歸去  
停鞭韁

大辛客寓看山

瘦馬行山中時恐墜巖谷昆蟲何不仁依險聚其族日  
役千餘人上下相追逐常怨山不移俾爾得生育今朝  
甫開門青山卽在目又如展名畫頓忘食饘粥喜慍亦  
何常山中好結屋我本山人歸去種松竹

自西山歸遇雨

日暮西山歸斗然遇風雨道旁捕蝗人環跪在泥土自  
言愚且賤未能爲賓主矐中有茅屋暫避公無距役汝  
已十日相親不我怒此風何其淳毋乃是太古我行携  
雨蓋我歸醉宿酤汝輩勞且饑去去閉蓬戶

贈金瞻魯

東牟壯士無人識我行得之有氣色千金戰馬閒不騎  
上出雲霓下不測此來捕蝗非殺賊以此殺賊賊可克  
白面書生難與謀試問何事可報國

抵鐵介

只疑山已盡隔嶺有人來路逐清溪轉花從老樹開鐘  
聲何處落樵唱此中迴忽忽忘衰老蒼茫負酒杯

山中

不愛山中行只愛山中住山路不可窮山光無盡處行

時畏偏仄住時得深趣如何山中人但知行山路  
白雲生山中俄頃到天上天雲與山雲變幻難爲狀有  
時作霖雨有時自蕩漾睨視山下人翹首空仰望

偕李刺史吳孝廉遊七十三泉

附熱羞清夜鄉情話此間雖然殊故里已是置仙班風  
不暫辭樹水如原在山歸來夕陽後尙妒老僧閑

題畫

醉後昏昏午夢長起來依舊汗如漿小樓記聽芭蕉雨  
一枕秋聲入畫涼

墨琴蓮花幅

明湖荷花種百頃不曾開在無人境輕橈畫舫時來游  
雜遝青衫翠袖影水中沉沉孤野鳬一羣家鴨歡相呼  
避客驚飛爾何物可憐翡翠毛羽殊昔我買舟待明日  
一夜霜風吹不歇蓮花落盡蓮葉收倒影清清見城闕  
爾時名士如星雲高歌痛飲忘宵分欲采蓮花無處所  
七橋衰柳徒紛紛今年僦宅橋邊住門前望見繫船樹  
蒸人暑氣無從消不曾踏著湖上路何緣四座香風吹  
幽人翦取芙蓉陂爲我中堂置屏幃欲將好畫催惡詩

湖上蓮葉有時淨  
畫中蓮花日掩映  
安得美人歌采蓮  
攜手湖邊照玉鏡

同王霽堂趙墨琴上千佛山

城中看山山不高  
空有巖阿擗臺榭  
及登山上看城中  
上萬人家在足下  
紛紛冠蓋揚飛塵  
日烏月兔何逡巡  
蝸角蠅頭競得失  
幽人耳目無見聞  
山上城中去尺咫  
亦知大知已如此  
何怪鸞鳩檜榆枋  
不識扶搖九萬里

同諸同鄉陪張碧泉主政遊大明湖

選勝客初到  
倦遊人亦稀  
香風生古渡  
涼氣上秋衣  
湛

口穿花入船頭載月歸心隨輕桂楫還向故園飛

孫嵩峰新居

結廬先種樹室在綠楊中好客仍陶侃移家卽葛洪市  
廛今自遠車馬舊曾通到此誰能去壺尊本不空

韓化南贈筆

我不曾夢中得筆如修椽醒來草制丹墀前又不曾一  
夜生花滿筠管文思煥發當少年老景顏唐百不中快  
劍難斫馬難控有時醉後長短吟籠鶴檻猿少飛動忽  
忽慣作行草書先述亥豕與曾魚詩旣粗率字亦醜三



錢雞距相吹噓君從何處市得此宣城諸葛可廢矣旁  
鐫三字純羊毫左發右發強弩矢我聞筆工爲此勞一  
半或得其一毛壁上懸之日熟視縛成價比南金高世  
上譚詩失李杜書家虞褚早黃土空有敗筆成高邱筆  
工應慚作筆苦我今合處奚囊中不教脫穎爭雌雄坐  
待秋分明月夜相看氣燄飛長虹

登琴臺同雨蒼獻廷藹亭嵩峰儼若映輝致祥兄弟  
千古此高臺登臨暮雨來昔人不可見我輩有餘哀蟋  
蟀空多恨芙蓉白晚開河流今未改濟世正須才

贈琴臺僧

燕子桃花憶舊遊  
高臺落木又驚秋  
故人一半歸黃土  
羨爾山僧未白頭

題楊又山同年戴星圖

必子宰單父鳴琴不下堂  
繼之耆巫馬出入星有光  
勞逸不同治各用其所長  
前賢去已遠後世多循良  
梟廬廢白日絲竹娛昏黃  
反嗤惘惘吏不知弦更張  
食祿大平世何以酬  
君王吾友又山子  
剖符來此方登臺肅  
遺像俎豆餘馨香  
鼓歌自大雅風流  
今未皇乃圖戴星

像期也相頡頏一人佩刀侍意氣飛秋霜一人持矛立志欲催天狼又山襲而出斜月懸東牆一時盜賊靖萬古狐魅藏四體自勞苦未敢安筐牀我時在鄰境竊願携同行筋骨愧羸弱議論慚疎狂慨然解印綬歸臥白雲鄉又山亦早去有母朝夕將今來復何事汲汲憂農桑前年決河水萬姓偕流亡斯人不早出南箕空簸揚既來莫遽返北斗同瞻望此圖不時有此人安可忘

題又山汎海圖

天地視一海杯水覆均堂世人兩眼小於豆乃謂海爲

百谷王或望而歎或却而走一生不敢輕易觀汪洋豈  
知平地風濤甚於海海上乃有千年不死之仙鄉謂地  
非地水非水乘舟策馬皆康莊知此者誰楊夫子不駕  
鼉鼉不控鯉短蓬裊裊颺茶烟獨坐船頭閱外史波平  
浪靜如磨銅照見青天九萬里星辰瑣細那足論捉日  
捉月在手指魚龍百怪深潛藏可無鯢化爲鵬之翼怒  
飛起漾漾小漁舟得魚沽酒無所憂茫茫大海舶外夷  
珠貝堆層樓此子不漁亦不賈坐看朝潮夕汐無時休  
乘風直到蓬瀛與丹邱欲問小九州外大九州召畫史

圖壯遊世有鄒衍談天口曼倩元虛侍左右然後一出  
此圖質可否莫教局局促促世上人飽食寒具汗油手

題又山歸田圖

二月新秧出春水八月秋風食稻米河流不溢蝗不憂  
寬徐之間豈有此生強仕非公孤無田亦爲人傭奴  
如何有田不歸去折腰屈膝慚此圖此圖中田無百頃  
上縣縱橫及萬井百頃就治萬井荒亦獨何心效箕穎  
本是聖朝耕鑿民未能安坐辜青春君先我後言不  
食南旋過問歸田人

驢鳴行

百里馳驅人已老投宿黃昏苦不早燈前濁酒斟深杯  
襖被繩牀隙月皎回鄰夜靜無喧呼第聞瘦馬齟枯草  
遙遙旅雁依汀洲點點棲鳥上樹杪忽然一聲來槐間  
屋瓦欲飛牆欲倒未必虎豹深相驚多恐蛩蛩半爲惱  
其風其逸未可知謂覺謂盲總難曉一聲不已續聲聲  
不知長鳴有何好隔牀倦僕眠正酣嚙語嘈嘈聽不了  
披衣剪燭爲長歌却鬱胷懷試一掃如何名士偏歡忻  
弔客情深尙擾擾

秋對月

居人中秋見月喜  
行人中秋見月愁  
居人見月團樂坐  
當歌對酒無時休  
行人離家幾千里  
湖光山色空悠悠  
試問青天有此月  
可曾夜夜如中秋

和徐耐村九日遇雨

共有登高興  
秋花繞女牆  
殘雲如盡卷  
老氣豈嫌狂  
海色連天濕  
潮聲入夜涼  
城頭空負約  
且待古重陽

秋

江總三公尙黑頭  
平生甚悔附清流  
夢中願作莊周蝶

客路誰如李昉鷗矜貴文章非傲世牢騷意氣亦驚秋  
玉皇天上能相召散髮騎鯨不解愁

畢笠江至

經年不相見只說上神山弱水三千里仙人不可攀  
孤舟風雨漫一枝海雲閑忽跨清秋鶴翩然到此間

同諸公登東津城樓

屹然百雉枕清流與客登臨共賦秋片片飛帆來海外  
蕭蕭落葉下城頭饑鳥寒雁依殘照蔓草荒烟認古邱  
幸值昇平無事日何如王粲在荊州



自憐

自憐遲暮日易稱此頭銜卜宅依民舍當關數海帆無  
人詢治譜有客典朝衫醉後登高望閒愁半就菱

泛海

懶向關頭臥飛帆作壯游長天到海盡大地與波浮自  
欲笑河伯忽思盟水鷗神仙殊渺渺何處有瀛洲  
海潮隨月上我亦返孤舟不擾魚龍夜祇悲天地秋風  
寒驚渚雁水白悞沙鷗擲罷回飄鼓張燈上酒樓

西隣石後歌

嫫皇補天竟遺此五色紛綸煉石子祖龍有鞭不敢駝  
萬古亭亭海城底龍泣蛟怒鱗甲枯風飛雨走靈有無  
四七星辰瑣碎甚在天應列三垣隅織女支機尙小用  
上帝樓成藉汝重如何好事藍田翁第乞白石數升種  
吾將海上從羣仙玉爐丹鼎一飛青烟芝草琅玕棄不取  
煮爾食之壽萬年

黃河水決入濟水直抵利津城下

九月二十六日

怒濤勢欲捲城樓縱是閒官亦自愁久已蒼生無樂歲  
何堪洪水又驚秋帝沈璧馬歌瓠子臣駕鼉鼉問濟

流一夕馮夷歸底定安瀾直到海東頭

大水行

九月二十七日

濟水清河水渾河伯一夕相并吞東馳入海失故道海  
若見之怒且笑長鯨鼓浪如山邱颶母揚風西北陬朝  
潮夕沒無時息鐵門關外魚龍愁有口不肯咽濁流河  
伯旣來勢難返東衝西突左右撼氣力所至生風雷堅  
城勁壘愁崩摧何況千村萬落底壤牆破屋臨水隈如  
何揜拄空悲哀吁嗟河伯胡爲哉飛帆高高樹杪回坐  
見男屍與女骸紛紛藉藉西流來我有文章幾卷在不

如韓潮與蘇海我有飲興空自豪不能一吸傾江濤不  
然酌爾入酒杯濡爾入筆毫頓教河濟之間變乾土不  
令朝饑暮寒老幼相煎熬閑官無力寄居此徒自抑鬱  
兼牢騷嗚呼河伯不仁乃爾爾濟水之東尙如此濟水  
以西可知矣何不安流入海水

胡乙垣來旋辭歸感賦

出門祇百里作客未三旬早有還鄉夢長同失路人夕  
憐祠竈婦朝憶倚門親金碧如天遠何堪歲又新

聞乙垣述漁洋詩筒之韻慕而賦之

胡生早歲耽吟詩阮翁恨不生同時蠶尾烟深石帆雨  
夢中徃徃如見之翁昔言語妙天下半世傾心是徐夜  
落筆齊將翡翠裝停毫爭把珊瑚架徐君小隱無宦情  
有時畏入高苑城咫尺相思不命駕惟憑青鳥通姓名  
阮翁乃截淇園竹清韻琅琅媚幽谷寸心自訂金石盟  
尺素如遺鯉魚腹上鐫私印徐與王王家復有書數行  
司馬橋頭小逕滑村人乍見譏癡狂不獨詩卷可千載  
一尺之筒至今在李囊薛瓢同消沈此物不朽將有待  
落君家手何曾難借人醉後輕相看海嶽故事君知否

蟾蜍淚滴珠闌干

送乙垣歸

不識與何事往來風雪寒車裘貧士少波浪大河寬  
未俗賣文賤窮途賒酒難家庭真至樂歸去話團樂

贈徐耐村

落拓相憐兩鬢華揚州烟月早思家依錢絕似羅昭諫  
知仲惟應鮑叔牙客路不妨聽臘鼓道人自合號梅花  
禦寒我亦羊裘傲風雪難同下澤車

夜雪

依依此官閣寂寂似江村不掃階前雪無人夜到門

謝趙介邱學博畫松

海畔人家只種柳搖落秋風負白首先生來自岱山巔  
畫出蒼松盡駭走曲枝直幹皆奇材高巖巨壑無塵埃  
身到先秦避雨地橫空攫取生龍來世上真松尙不愛  
樵逕嶢嶢上山背畫松何況非真松冷突寒烟坐相對  
豈知畫龍便可騎上天畫松正好松根眠龍耶松耶看  
不定眼中絕迹飛雲烟昨日從君得兩樹想見仙人著  
書處海濤一夜來天風自欲山中結屋住

寄龐詩鈔七

甲子

寧州劉大紳

送徐耐村辭東津

新燕營故壘呢喃語繡閣鴻雁呼儔侶高天瞰寥廓歲  
歛雁聲哀歲豐雁聲樂豈不懷安樂鳳皇不我諾下視  
樊籠中雞鶩俯首啄人生各有志安能委溝壑河畔冰  
漸消一帆春水濶去去招舟子遠行殊不惡

短歌

仕宦不得執金吾娶妻不得陰麗華便當三萬六千七



天台醉臥仙人家朝別青山巔暮辭白雲嶺四山麋鹿  
驚相呼一樹梅花淡無影眼中何所見耳中何所聞不  
見公孫開東閣但聞梁家甲第高連雲左嘯成龍右成  
虎蛇行四拜人紛紛天生男兒昇兩膝爲妻子跪尙垣  
率鄉園饘粥河嘗無誰俾爾作處禪蝨昨日道路迎人  
來明日山川送人回舟車無怨亦無德水行陸行眞快  
哉祇恐蹉跎歸去後面目羞見東鄰叟鄰叟一裘三  
年負薪止向山中走

病

他鄉金盡處孤客病多時酒冷愁消漫羨寒夢到遲求  
仙曾服藥送鬼又吟詩借問庭前樹今春發幾枝

預壽伯兄六十

吾兄乙丑生今歲次甲子八月朔八日行年六十矣我  
遊東海濱君居彩雲裏無由酌大斗介壽蓬華底爾時  
巖桂枝盡作黃金蕊清風徐徐至香氣勃勃起扶將阿  
母輿兼捧大母几進饌烏雌雞加餐白稻米左右顧婦  
孺謳歌聽鄰里怕怕諸弟昆雁行佐甘旨家庭有至樂  
不獨阿母喜忽然憶遠人得毋門閭倚再來了無補豈

爲祿養仕鴻雁終難鳩鱸魚未易徙冬春迫寒暑夢寐  
及山水未逮懸車年亦幾杖鄉齒歸與不早賦徒自戀  
青紫假使今旋家上堂潔修灑豈敢言二老亦可笑相  
視人生在故鄉不知鄉味美遠道回白首乃悟昨非是  
矧值家慶時瞻望誰能已作詩寫尺素待與寄雙鯉

寄徐耐村

徐君寄我詩一卷一字三縑價猶賤夕月初出星有光  
百讀千回老不倦輶車早發東津門馬蹄淺印新泥痕  
長路無人慰酒渴一壺徑飲何處村只道君爲阮籍哭

豈識高狂駭俗目擊楫悲歌倚樓吟絕勝彈絲與吹竹  
行到濟南湖水藍燈船玉手分黃柑况是揚州騎鶴客  
定知瀟灑如江南俗吏半生道上長手板脚韉惹塵埃  
鵲華橋畔春色深觸著舊遊勞夢想此身所到聞呼號  
濁河晝夜還滔滔嫩柳纔黃宿麥短餅香無日空鬱陶  
我固閒官干甚事不奈咿咿詔得意欲換輕笠披短簑  
從君湖山共遊戲壯心已減十年前無情白髮羞老顛  
昨日清明臥車上倦聽杜宇啼畝田屈指佳節又上巳  
不見成蹊有桃李問君一事君厭否片片雪花落海水

城東南堤成爲同官賦

畚鍤千夫荷沙堤鑄鐵如不憂城沒版何懼衆爲魚官  
是長貧後材當小試初閒情種桃柳春色映清渠

弔濱州倅張問遠

忽聞君已死風雪憶同舟救患分香餅安貧擁敝裘蒼  
生齊有淚白骨竟誰收一帶門前水春來尙濁流

午後行田間

河水東流不復回老農徹夜自悲哀日長莫枕鋤頭睡  
門外催租吏早來

三月二十三日黃河塞

下民昏墊

帝不忍璧馬旣沈河伯蠶飛廉一夕天

上來約束鯨鱷如蚯蚓

是日北風大作河遂南流

馮夷顛首顏色灰

順流不敢輕徘徊乃知黃河一帶水听然自喜胡爲哉

百川清濁固時有萬載但循故道走爲問積石導何年

九折可曾一清否我

皇有德符帝堯宮中爲爾勤

旰宵疏鑿縱使少神禹

穹蒼感應非遙遙豫袞徐

揚無濕土自此長堤足千古秉圭服冕祠巍巍陽侯有

靈嗜歌舞決非爾罪塞爾功雲旗翠罕搖春風回頭應

笑漢孝武飢于河築宣房宮我今作詩維志喜月在戊  
辰歲甲子億萬斯年 帝不憂臣亦扁舟海雲裏

屬希尹題畫松卽以畱行

官貧畱客無綺筵美人不爲彈冰絃壁上畫松適一幅  
與君並坐聽風泉畫本非真亦非假亂舞虬龍草堂下  
澎湃波濤來滄溟陰深雲雨積盛夏其上萬蘿無附枝  
如人倔強兼支離亦許苦心容螻蟻肯教空腹藏妖魑  
若使老人手種此入土青青一松子十載幾度驚風霜  
一夕無由媚山水縱然宛轉邀君歌嘯猿警鶴愁空多

試看畫筆一何好須臾老幹依巖阿詩家歸去不作賦  
世間何處覓奇樹我今局促成短吟看汝縱橫掃絹素

和希尹夜鳥詩

慈烏哺雛深樹枝枝上月明烏啼時畢逋衆雛解母意  
啞啞謂母無驚疑兒有羽飛有喙啄不憂彈射虺與蛇  
雌鳥語雄卒哽咽雄鳥顧雌終淒其幸得完卵翼長之  
尙恐孱弱須護持自是鸞子意良苦不是返哺望兒知  
烏乎爾雛依依在巢底寂無風雨安不危百折千回月  
欲落啼聲入耳何其悲我今有母在萬里一官幾載輕



別離老人夜長寐易覺如何不思遠遊兒君不見中庭  
樹上慈烏慈

續夜烏歌

烏母哺子旦夕不違羽翼已就烏子將飛烏母謂烏子  
世路多險微地上螻蟻細田中禾黍稀得食不須飽早  
出及早歸汝不早歸吾思汝知汝飛飛向何所江上迎  
船大嘴烏謂是神鴉解巫語丁寧告汝勿學之牛背夕  
陽自容與鷓鴣之內登於俎弋人憎繳有時舉文禽彩  
翠毛羽鮮頃刻顧盼失儔侶汝於世人無患爭雄呼雌

應風日晴舊巢旣安新巢吉深林莫更鳴不平烏母語  
長烏子喩啞啞人豈知其故朝出得食暮返哺烏母有  
子喜不怒

題崔樸畫

筆力何雄渾圖成氣象尊入天無石色出地有松根猿  
鶴結遙想雲霞餘舊痕空山自千古不暇寫烟村

贈希尹扇賦詩相謝復和一首

毋笑會稽王內史書扇祇博老嫗喜不如謝公持蒲葵  
小物聲價一時起來舟蕩漾洪濤中河神嗜好常人同

兩袖嫋嫋未刼去入門習習揚清風近日炎威如甯怒  
山谷咆哮失乳虎掃除斗室忘歎蒸赤腳踏冰無所苦  
賦詩贈扇聊相娛松枝菊葉陰森俱此夕可風亦可雅  
蠅營蚋嘬供盧胡豈無炙手絕倫者冠帶千夫拜牀下  
氣雲汗雨誰爲憐臥簟垂簾自瀟灑我有大扇人不知  
用之六合熏風吹終歲頽然老屋底仰視晴空恆赫曦  
君聞此言毋乃笑熱中膏盲疾難療不見古人貧賤時  
賢達飯牛聖屠釣

空山美人鼓琴圖

山水佳處橫琴獨彈  
梅花一樹清香時來

是何美人顏如玉不貯漢帝黃金屋空山晝靜梅花香  
獨抱瑤琴彈一曲正聲寂寂無人聽哀鸞別鶴于青冥  
不見宓妃出洛浦湘君昨夜來洞庭琴在匣中祇獨晤  
絃在指下向誰訴畫師可是傷心人含毫綿邈神相遇  
男兒抱技矜軼倫侯門雜沓稱伶人高士若無戴安道  
輸他娥眉不曾嚬水繞雲停調未改花落月明欲千載  
一朝天上騎龍歸悵望美人竟何在

擬王建田家畱客

四月風清小麥熟田家畱客宿草屋客有車馬無停處

車置門前馬繫樹田家於客不相知客是遠道初來時  
一夜安眠不復覺老翁倚牀呼大兒今年盜賊滿四野  
客僕旣倦我鄰寡似聞前村犬唁唁急起披衣看客馬

借閱漁樵耕讀圖因賦

何來畫史人中奴一生曾見山水無點染生緘四五尺  
云是漁樵耕讀圖啞啞老樹啼雌鳥日長欲睡無工夫  
短榻魚鱗次畫軸婆娑老眼愁模糊詩人來自錦秋湖  
曾羅十斛明月珠每一詩成一大白三朝題遍狂歌呼  
炎風昨夜吹海隅晶簾破碎冰簟殊何可一日不讀書

鄰家惱亂如索逋似此文沈應廬胡村醪有味空相酤  
人生樂事林泉耳忽憶故園思故吾青峰萬疊當城郭  
一江白水橫舳艫葛屨穿風逐走兔竹弓抱月墮飛鳬  
有時薪桂烹鮮鱸充筵薇蕨兼箭蒲隔牆相過是鄰友  
課雨問晴真吾徒稻田百頃皆膏腴種瓜有疇芋有區  
我亦挾策牛背上水光漠漠看鴨雛草元何事供覆瓿  
金門獻賦欺庸愚儲柳田園詩自好但倩黃癡及倪迂  
高冠長劍胡爲乎束書不讀犁不扶及早歸從漁樵後  
莫教好手羞眉鬚

四月二十八日夜夢歸

昨夜夢還鄉登堂拜母氏問我來何日夢中記不起但  
覺母顏歡肥瘦未暇視大母亦在堂其癯乃無比須臾  
兩伯父扶杖偕至止相見喜且悲或疑在夢底嚙臂臂  
知痛仰望日出始歸來或是真得免門閭倚門前老烏  
鴉返哺思其子中夜月色黑啞啞啼樹底知鴉有夢無  
微物尙如此吾父亡卅載薄塋鳳山趾松栢幾許長墳  
土恐就比胡爲並無夢哀哀淚如水

自題小影

此身不生秦漢上躍馬橫戈敵膽喪坐令舉世無英雄  
勝下小兒拜大將上萬言書詎異事殿陛立譚取卿相  
不然游說帝王間如馬文淵亦足尙胡爲低眉摧心顏  
手板脚襍辱塵坱上官一見一屈膝不堪妻孥遙相望  
假使醜態人潛圖面目豈復男子狀前年早作田間叟  
坐臥丹崖與碧嶂一時解后平陵生爲我貌出荷鋤相  
今年又復厭奔走高笠短衫思放宕畫師四顧嘆無人  
經營何處勞意匠高密時家丹青好頭上不冠進賢樣  
大黃羽箭不在腰左手九節青藜杖我有鬚眉乃畢見



白髭較多固無恙麒麟凌烟古來稀山水中間神自王  
明年若不賦歸去負爾圖形入屏幃

高臥樓

借得樓居俯海城連雲舊宅別題名采鴻不是偏春日  
王粲同餘作賦情高處何能望故里臥時還恐夢蒼生  
此身直待南歸後一枕安眠浣水清

題畫牡丹

多染燕支不著痕翩翩蛺蝶亦消魂天然絕代風流樣  
寄語春風莫市恩

高臥樓漫興

莫笑狂夫老更狂，九層縹緲在何鄉。  
戲分宏景延賓座，懶下元龍臥客牀。  
俗氣銷餘空海岱，異書讀後小滄桑。  
聞雞越石醒偏早，北斗簷前倚劍長。

鐵門關外長鯨魚，不使閒官有敝廬。  
每笑買山纔吏隱，誰知卜宅得樓居。  
烟村羅列棋差似，河水縈環帶不如。  
僻縣城頭有何好，憑欄亦愛夕陽餘。

有客不須吹玉簫，詩瓢茗椀暮連朝。  
高樓舊逐仙人好，偃臥新同處士驕。  
最稱風前過夏日，相期雨後度晴宵。

此身如出人間世天上雲霞手可招

龜茲枕畔送潮聲疑踏金鰲背上行海市有樓應更好  
仙宮畱客自多情如何馬援空聽笛不共王喬一弄笙  
金碧山川天外遠幾時安夢到昆明

豐國鎮

武定同知舊署所  
在一夕沒於水

北溟東去渺無邊岸畔居民有數椽可笑官衙成斥鹵  
也疑滄海是桑田漁人凌亂爭收網龜戶蕭條半禁烟  
日暮鐵門關上望富商大賈泛樓船

醉歌三首

萬樹扶樓齊下拜樓上仙人玉帶解蒼蠅側翅飛不前  
手揮麈尾望青天風不到海風小王雄庶雌一齊掃  
長梯上倦人三休獨自憑闌看飛鳥大鵬南徙雲翼垂  
沙渚與客盟水湄小知大知各有分人生嗜好無定時  
興來且飲青州酒不醉莫使下樓走高樓日落易黃昏  
欲摘星辰懶舉手

海外仙人跨鵬背瀛鶴饒鸞羽毛碎長鯨千里青山高  
卷入窄袖飾玉袋御風客向海上來路逢仙人暫徘徊  
瑣子珊珊欲飛去手出蟠桃三五枚桃核半片大如掌

桃實已熟我未糴料得花開顏色鮮仙人有爪我背癢  
仙人無情不可留東烏西兔何悠悠下土蟠桃種難熟  
且借大鵬天外遊

世上仙山不易有天台既出空回首劉郎太愚阮郎癡  
逢著仙人怕飲酒仙家半載何逡巡人間下界春復春  
王質看棋一欵局方平見海三揚塵未得長生且長醉  
醉後涼牀穩可睡長川鯨吸真豪雄高枕龍眠亦遊戲  
泉在山中清不濁雲在山中閒不飛百年有人山中住  
不望鶴出望鶴歸

雨中

樹底濃雲曉不流  
臥看白雨入高樓  
檐端早作飛泉響  
送到深山八月秋

雲

樓頭雨止夜烏棲  
共說田間雨一犁  
尚有忙雲閒不得  
紛紛飛過海城西

日日

日日懷鄉土  
年年與願違  
一官閒處老  
萬事雨中稀  
潮濶魚鰕上  
林深鳥雀歸  
高樓不肯臥  
去去欲何依

熱

老樹墮烏鳶深潭竄魚鱉千年破塚底狐兔亦畏熱忍  
渴逐赤日轅下駒汗血沈沈柳陰中散髮鍛生鐵洪爐  
雖炎炎清風自激烈人生秉性異孰能固高節青山入  
杳冥上有太古雪真仙九成臺獨自飲芳烈寄語拾金  
人負薪須決絕

游仙曲

九重天上天不動斧斯若木作梯用關門虎豹如犬馴  
不曾吠客聲嘻嘻上帝清朝特賜宴天上天外人相見

自持北斗挹酒漿金輪徐引玉漏長霓裳一曲來月宮  
歌喉宛轉隨天風小臣醉領歌中意再拜退作玉樓記  
研池汲罷銀河乾瑤妃磨墨海波翻綠字書成雲五朶  
上之天帝制曰可樓上勒文有圭璧歸來不見殞星石  
七夕後一日

天孫良夜恨迢迢歲歲銀河駕鵲橋乞巧平生不曾慣  
竟忘七夕是前宵

移居城西

到門先見樹並坐有幽禽早償移居願重生避俗心秋



風城外早涼雨夜來深急與東鄰約同爲抱膝吟

讀宋步武成山近稿

讀君詩卷後神與謫仙遊鞭起秦皇石帆開徐市舟潮  
聲天盡處日色海東頭刺手鯨鯢影文章鎮古留

書東野句寄李星五先生

齊有隱君子姓名埋世間悲秋竊聞宋生傳惜無班人  
物古居上情懷今在山寄書東野句清峭養高閒

石子真寄書及詩並張烈婦事畧

飄泊不知處傳來詩卷多清秋水葉下薄暮雨聲過酒

冷從今醉燈殘憶昔歌堪悲賦團扇欲和竟如何

書張烈婦傳後

凜凜生氣是女子世上男兒羞殺矣君不見嶧縣烈婦  
張士景妻徐淳女夫死四日婦亦死爲景也婦已三年  
不忍獨生求其是舅姑姊姒莫能止烈婦之烈烈如此  
長山石子寄書來要我徵詩傳後禩烈婦志死非求名  
哀烈婦詞須烈士文人無行安可傳生值 昇平譚性  
理義孫義子甘爲之此而譽婦婦曰恥受命 朝廷  
公不私不如且待有司誅君不見佳傳未立先索米北

魏書成號穢史陳壽魏收曷足取嗚呼安得韓門李

楊烈婦高  
愍女二傳

題吳南薌山東三大圖

昔者漢有司馬遷歷覽天下名山川交游豪俊窮幽燕  
文章奇鬱西漢間猶嫌耳目隘且偏及登廟堂心穆然  
如浮滄海凌岱嶺車服禮器先澤傳低回不去將判年  
向平自畢婚嫁緣宗炳祗圖衣袖邊之二子者何藐焉  
南薌今日勾吳賢半生齊魯常流連袖携大筆如大椽  
縮海一勺山一拳圖成氣象看萬千乃信觀海爲水難

小天下者非妄言吁嗟孔聖誰躋扳再拜繪之如繪云  
懷望松栢紛連蜷我亦曾攬天門烟白馬匹練神悃悃  
爾來欲買徐市船十洲三島求神仙颺風未必真吹還  
一官匏繫終拘牽龜山狄水徒鳴絃小詩題畫無完篇  
卷歸君筍高枕眠故鄉有夢安林泉一邱一壑清而妍  
桃花春水營墓田醒來月落星高懸長見君畫雙眼前

題吳和軒滄江曉發圖

十丈樓船待曉開大江中載謫仙來兩頭清酒千詩卷  
爲報天吳莫浪猜

歸鶴吟爲鄧頌伯作

名石如懷寧人

山人前身鶴一隻此生非鶴不爲役  
騎矜勢力難相干  
歸鶴嶽嶽歸壁逸士俠客一身兼  
能令太守貪亦廉  
鳳瑞麟祥世上少作書大笑掀長髯  
三十六峰千金聘  
百年前已聲價定化鶴不負袁郎中  
豈是區區爲僧競  
鶴去山人心傷悲鶴歸山人歌別離  
山人歸去鶴在否  
千里百里長相思

吟歸鶴之次日南薌復爲頌伯作載鶴圖重歌

秋風嫋嫋秋月明江干無際孤舟輕落雁飛鴻不知數

中有山人聽鶴鳴。山人作客宿人廬。豈有千金聘鶴侶。  
寫經自欲龍鶩羣。作賦空將獻鸚鵡。一聲清唳來山椒。  
長松翠竹凌青霄。子晉吹笙情脈脈。浮邱把袖意迢迢。  
主人暫出爲世用。携鶴何辭減清俸。登車且許瑤琴隨。  
杖劍祇教駿馬共。寸心慷慨持贈時。深情一片江水知。  
洲上忍饑視魚子。磯邊亂啄看鷓鴣。江水清清影爲濕。  
五尺昂然如人立。牙樯錦纜紛相牽。作伴蓬窗甚底急。  
須與天外是金焦。已過瓜洲望不及。九華山色秀可餐。  
誰能分飛偕鳳鸞。歸來妻孥笑相指。鶴似山人風骨寒。

立壁原無雞狗擾比鄰長耐鷺鴨惱乘軒娛客胡爲乎  
支遁門庭俗士少有夢不離北固山多情只在集賢關  
直將佛奴換名字好與禪伯開心顏昨日得鷓如得友  
共濟不同吳越偶今日寄鷓如寄身爭食肯逐雞鷺後  
名山第恨遊人多莫矜善舞頻婆婆樊籠一入門戶閉  
紅牆百尺高嵯峨山人祝鷓語絮絮同生天地孰非寄  
長憶江上風月秋船尾船頭掠雙翅何處長官喝道來  
共知衙齋非仙才黃鸝悲歌聽不得惡聲怒發轟迅雷  
一紙書成鷓無恙肉味未登鼎俎上從此山人快遠遊

雨瀨晴灘如同舫昨日示我歸鶴書我爲短吟聲唏噓  
延陵今又圖載鶴山人此行樂何如載鶴鶴戲江上水  
圖鶴鶴飛腕底紙諒爲山人如是乎惜哉我歌平平耳  
題得鶴圖

若無黃鶴贈歸去只空舟幸未開籠放長將鼓棹遊一  
心臨白水同夢入清秋勿使蛟龍得烟波江上愁

題寄鶴圖

獨立江皋衆所嗟皖公山外寄烟霞排風本是仙人騎  
警露權歸佛子家殿上尙懷青鳥使池邊不啄白蓮花



客來祇恐婆婆舞悞逐雞羣傍使車

夜坐憶家賢時赴朝城

夜靜星光大秋清樹影高空庭待殘月坐久憶兒曹  
晨有行人去家書寄汝看書中無別語只是說平安

寄師望江荔扉兼憶默齋檀先生

家鄉久已屬公卿到老風塵隊裏行能禮布衣真下士  
不矜循吏豈沽名五絃彈罷江千里百首吟餘月二更  
與我神交今十載幾時聯轡返昆明

雞狗年年罵董龍空山黃葉聽秋蛩誰如我拙君能愛

豈有人癡世尙容關抱鐵門稱吏隱詩歌石鼎想仙蹤  
草堂摧落風流後墓道傳聞宿莽封

甲子秋聞內簾監試作

秋氣沈沈夜漏中一門鎖鑰敢言功任教和仲憐方叔  
莫把顏標認魯公場判東西如列宿簾分內外不通風  
須知

聖主掄材意恐有浮雲蔽太空

文學彬彬鄒魯風青齊表海亦稱雄若令閤闕歸衡鑑  
豈有科名到困窮一路黃花風欲落滿林桂子月當空

全憑大道無偏黨慰藉十年辛苦功

示庖人

炊烟一縷出牆遲門外爭傳日影移  
語汝無嫌供給少記曾咬斷菜根時

示阜隸

傳呼不待雞鳴後阜隸聲喧到枕邊  
我與晨門同吏隱煎茶風味讓羣仙

初九日作

繞郭山青湖水溶不禁門戶鎖重重  
唐人通榜舊風氣

漢代傳經今士宗矮屋文酣成鬪蟻閒官眼老負窺龍  
清秋勝事知堪賀翹首雲間五色濃

文氣頻看射斗牛問誰立志足千秋尙多炳炳前賢事  
莫但陳陳故紙求檢點科名無李杜溯洄聲問有韓歐  
年來幾許傳人在誰是

熙朝第一流

自題木尺

海岱文章入選樓一簾風月赴清秋昭容玉尺無尋處  
手握山中壤木頭

戲贈湯月槎時爲內掌卷

烟雨橫江截素鱗  
無帆小艇白容身  
歸來大笑祇空手  
網得魚鰕送與人

中秋

客邊又過五中秋  
怪得今生易白頭  
遙送笛聲誰對酒  
高燒燭影未忘憂  
假如天上原無月  
料想人間定少愁  
莫再明年不歸去  
茫茫海岱賦登樓

聚奎堂上雜咏

分卷

簾內平分卷一箱森如束  
筍立如牆不愁散帙較人少  
但恐衡文空自忙羣蟻附  
枝爭得國衆蜂掇蕊各歸房  
扶風不是無絲竹早望彭宣到後堂

閱卷

采藍磨短硯磨穿誰是今  
秋八穀賢姓氏未通先白眼  
文章無用遜青錢暗中摸索  
原難事近裏機關孰透元  
忽有光芒來牕底珊瑚擎出  
海人船

薦卷

得士焚香欲告天衣冠長  
揖王司前是人不在孫宏後

此文應輪祖述先一縷深心針芥合千尋寶氣斗牛懸  
明珠魚目誰容混九曲曾將蟻細穿

取中卷

高懸秦鏡照妍媸月白風清莫更疑不以門人偏置後  
豈於行卷漫相知三年積學有成日一片初心難負時  
從此又傳班玉筍二東人慶得經師

搜落卷

誰人買櫝竟還珠驪領蚌胎遺也無懼有馬前投瓦礫  
願從帳後得生徒鹽車已困猶重顧匕首無成莫再圖

半世升沈今日定外間醉夢尙狂呼

撥卷

文字因緣本不差門牆廣大漫相誇秋風同盡三條燭  
夜月分煎七品茶前院笙歌移後院東家桃李蔭西家  
十洲三島皆仙境誰認安期手種花

落卷

頃刻羣山木葉空秋風原不似春風佳人自惜傾城顧  
名士偏悲去路窮殘月有光誰共照微波無語絕難通  
登高宋玉還能賦只在蕭蕭落日中



刻硃卷

三篇文字達長安計日春花走馬看欲挽一時風氣易  
要平千古士心難街頭買讀燈光暗榜下傳觀日影寒  
好是題重前甲子雷同勦說少窮酸

上萬和圃宮詹用江字韻

珊瑚一網千夫扛賈胡大舶爭繫椿蛟鱷震驚海水沸  
珠樓翠閣開晴窗公也衡文有如此昔臨小邦今大邦  
大邦有山長羣嶽厥水曰海容千江其人近聖崇經術  
不稱儀秦羞孫龐近來各自爲風氣尙無吠日唁唁龍

我公高高挹北斗有時香草尋芷茫明如暗室列大炬  
達如絕壑施長杠從此榜又開龍虎漫言齊魯人雜吮  
知公物望重不教星使迴雲艤桃李在門藥在籠七十  
二城低首降以輿相馬肥相士焚香午夜神猶懽我家  
兄弟產荒微於陸愧二丁慚雙彭宣後堂已許到願如  
老聃依常擬

上黃左田宮贊用江字韻

屹然禹鼎誰能扛詩家筆力移朽椿一時萬牛盡迴首  
蛟龍不敢沈船窗公之姓字早入耳今年銜命齊魯邦

鳳蹕蹕下丹穴雲霞旖旎過晴江才子文章神仙骨  
小徒氣體矜高麗鎖闥衡文有餘暇夜深小院聞仙  
烟燼香銷月色正秋風拂拂吹蘭茝但覺高歌入帝座  
不知碎影明天杠晚近士人習險怪星辰蠶蟻言多  
若無明珠出大海安能震動來千艘老眼不迷日五  
色青袍白紵都心降壁上旁觀只袖手名場有此神  
常懷世間豈少師弟子韓愈陸贄難得雙擁被脫肩  
儘閒事撞鐘伐鼓聽錚鏘

宮贊再疊前韻見酬再答一首

小爬大兕紛紛扛田夫待兔空守椿我聞此語常大笑  
終年偃臥惟北窗前月羽書催上道初心不負懷此邦  
畢竟郊寒與島瘦不如陸海同潘江塞外射鵰自避李  
治中展驥時輸龐使臣一夕天上至時聞虎嘯驚羣龍  
朗鑒高懸古代鏡艷情偶拾騷人茱健筆摩空欲摘斗  
奇才跨海能施杠氣壓文昌樂府歇歌凌賓客詩律咄  
正似天孫住雲漢欲往從之無飛轡我向管中得窺豹  
一斑才見心早降刻燭未銷鉢猶響又覩制作神愈懣  
自是一朝必獲五不徒每發時疊雙從此齊聲嘆觀止

敢持布鼓矜撻撻

贈張石農明府

龍門截業輿爭扛不愁月椿愁水椿雲路前邊石頭滑

東西搖動玻璃窗

簾官入內輿夫爭先俗謂搶龍門今年雨路不可行也

輿人徐

行不敢驟雨中一跌羞東邦驥足牛背較誰穩何如買

棹過吳江況我衰殘氣力少此時更合敦淳龐天上無

端喚守厠神丹空飼雲中龙欲與飛仙爲近侍衣裳珮

紉蓀與莊仙家盈盈隔秋水車無輿梁徒無杠且喜今

朝肯顧我論文不恤人言咙鬪險齊駟峻坂馬爭妍其

泛清溪艤君才十倍世無敵如何不先多士降縱使雌  
黃尙有口中乾外強心久懣玉尺從來未易握壁人自  
古原難雙欲贈一詩甫脫稿晚風落葉聲相撻

調黃澹人明府

澹人和江字韻詩聞甚好  
竟不及見爲短歌調之

芸芸麇鼎爭相扛視之無異株與椿君有金鐘並大鐺  
深藏不許窺軒窗夔曠卞薛世未有如斯懷寶非述邦  
喜我同舟得仙侶人材東漢詩西江御右甘心昔奉李  
牀前頻首今知龐自謂附庸比滕蔡況言四裔鄰冉左  
羨君優麟劣虎豹清於秋水芳於芷假使論文如論戰

望風大敵收旆扛美女都知有旗鼓世人可使無紛咤  
好是攻心欲再縱堪憐掬指偏盈艤定少孤軍背城借  
行將舉國銜璧降籌畫早令虜膽怯姓名何但兒心懷  
天下奇才本無幾人間國土安可雙夜半風鶴來何處  
金戈鐵馬驚相縱

汪栗園明府索詩成此博笑

明湖有約興不扛小船買就初移楫送人藕花最深處  
紅衫碧袖開小窗橫笛短簫聲未歇秋風落日懷鄉邦  
吾有此身吾有患安能一吸傾西江團樂坐說無生話

白髮蕭蕭思老庸蚤歲學仙太孟浪名山惱亂花間  
入世盈腰止服艾悞我獨扈蘿與茫邇來三仕亦自悔  
粗知涉世求梁柱木雁之間牝牡外難禁人語無喧  
畢竟此間少拘束羣仙共濟同一艘每誦一詩讀一畫  
極慙老億甘歸降君又索詩如索債我雖口應神爲懣  
天下才祇有一石田中壁固難十雙不如且訂湖邊醉  
蓼花楓葉聽交撚

卽事

夕陽光景未曾殘窮達均成閉戶難且喜今朝老名士



鬚眉長得隔門看

謂孫淵如先生時以觀察爲外監試

### 蟲聲

蟲聲唧唧似山村粉壁題詩淡墨痕殘月不來人睡盡  
鄉心已到舊柴門

### 贈汪栗園明府

得得憐才醉亦醒夜分明月入窗櫺榜花開處心如秤  
椽燭銷時鬢欲星幾見索珠嫌水赤自從把卷記燈青  
知君難忘當年事曾向街前抱鏡聽

聞月槎奉有檢詳落卷檄戲成索和

久住天台不是家風吹紅紫夕陽斜問君曾嗅花香未  
要與仙人數落花

贈郭平溪刺史

一輪白月向空橫列坐量才眼界明手不停披嫌夜短  
信無成見逼秋清堂前君自論文字榜下人都識姓名  
可恨朱衣藏暗處點頭悞盡老諸生

賀董映珊大史得元卷

夢中乘石上天難萬里罡風徹骨寒忽報朝來雲五色  
大家舉首日邊看

魚目龍鱗混得無  
光芒夜夜射菰蘆  
從前托鉢沿門去  
忘却衣中大寶珠  
初以得卷不足撥第十二房  
卷足之旋於廿七日得元卷

重九日待和圃宮詹左田宮贊千佛山登高

千林摧落易悲秋  
駭綠紛紅久不留  
獨有黃花澹於我  
故應揀上老人頭

城中日日浣緇塵  
笑煞籬邊采菊人  
全仗今朝短筇竹  
扶從高處置閒身

陪和圃宮詹左田宮贊及諸同寅千佛山登高

自笑登高到獨遲  
路逢遊客下山時  
帽簷儘有風吹落

不是參軍世不知

白雲黃葉入秋多  
石逕迢迢奈若何  
知有大人新賦就  
白頭空自拾烟蘿

名山名士兩相宜  
絳節蜺旌總委蛇  
雲岫烟巒搜欲遍

黔婁洞底識先師

宮贊戲謂黔婁爲祖師

高閣憑闌更渺然  
皓華兩點小於拳  
休將風雨催歸騎  
倦後秋山正好眠

同石農澹人從和圃宮詹左田宮贊由佛峪至龍

洞卽送左田宮贊北旋

峪之奇奇在神山中伏處宜幽人洞之奇奇在氣直欲  
縱橫塞天地兩山於我皆舊遊心追手摹無時休好景  
俱從險處得生機每向難中求自笑今年欠瀟灑朝逐  
暮馳暑不暇干林樹葉如桃花不曾盤空上人馬天仙  
聯騎天上來羣公日夜相追陪鵲華明湖看不足東峪  
西洞傾樽壘石逕欽崎太無理如蟻旋磨蛇出水佛鑱  
絕壁乘虛空人上高巖畫重累靈臺下瞰池水清池邊  
摩崖題姓名是時山靈亦愛客白雲紅葉相逢迎可憐  
夜短復晝短難得仙家刻漏緩夕陽飛上三秀峰洞壑

西來又一變急著單衫携雙筇然犀委蛇窺螯龍路怯  
傾危坐不立山嫌平澹奇且雄百年合向此中老一日  
來遊興未了仙人況且不可留驅車欲返長安道我知  
君詩韓孟偶畫意更似摩詰手君當留畫兼留詩莫待  
明朝別離後

題龍山圖

月落秋山空羣鳥夜號風念我平生友私恨無終窮草  
廬在何所深山又深處千丈高巖泉百尺長松樹畫家  
江南客天末幽人宅平生不相親烟雲萬里隔圖成如

有神龍山爲寫真乍見方驚喜再思還酸辛家居寡所  
歡出門長永歎豈謂畫圖底適軸吟考槃委形不可作  
榮名終有託且作古人觀神交付冥漠

南薌爲刻小行楷石印上奉酬一首

南薌書石如書紙弈弈精光透石底大者鸞鳳泊虛空  
小者蜻蜓戲秋水秦篆漢隸徒紛紛鼎已沈水碑火焚  
李斯程邈不再見南薌繼起超其羣腕下有刀如昆鐸  
犀象蛟龍氣力弱眼中無石亦無刀鬼斧神工何處著  
南薌擅此良有由八法六法深相求開合陰陽含萬象

心與物化神天游以茲餘事撫秦漢玉璽金章供點竄  
窗前第見烟雲飛燈下何嘗波磔亂我有兩石君治之  
丹砂印就彤霞垂昨日又鐫行楷字蠅頭細膩人難窺  
引以明鏡承以日一掠一鉤盡點漆乃信棘端能刻猴  
又知善射巧貫虱晴齋有此吾自娛天機揮灑腴不枯  
祇恐衰年目力減兼愁大力人負趨河圖之石授五老  
綠文赤字希世寶若令見此笑不休世上有人竊初稿  
觀文少保書歸去來辭敬題

晉亡靖節不亡晉折腰難繫彭澤印宋亡少保不亡宋



坐臥小樓泰山重兩公心事千秋符一生一死非異趨  
人讀陶詩謂平淡豈知陶詩腴不枯荆軻一章露本石  
正氣有歌公續得何年手書歸去來想見臨池池水黑  
公之大節人所知公書卽劣吾亦師誰信偶然弄柔翰  
顛張狂素相奔馳鷗波舫中亦書此義熙間人欲冷齒  
那堪厚辱玉帶生和墨殷勤汲止水此書與辭同不磨  
長爲本朝壯山河臯羽炎午曾見否使我感激徒婆娑

宿山中

夜涼睡易酣開門秋山曉丹楓應笑人黃梁夢未了

樹底宿雲淨嶺頭殘月明不知身早起反說鳥無聲

題江秬香孝廉任城太守孫夫人碑後

秬香集古師歐陽殘碑斷碣珍空囊昨日新交鳳石館

余時寓鳳石館欣然許我觀縹緗自謂神物終不朽西晉隸書

世尙有新甫古栢供樵蘇孫夫人碑鬼爲守或言晉代

祇俗書此碑結撰如魏初災日淋雨野火後磨刀礪劍

荆榛餘秬香蠟屐著幾兩免得其球委草莽匣襦未出

荒塚間屬鼎猶躋古墳上剜苔剔蘚相摩挲夫爵子姓

均未磨落日深山發長嘯不勞臆度煩撫訶是時阮公

芸臺學使執牛耳上窮碧落下井底武虛谷桂朱齋何華盤

敦間一心同盟如白水碑版正史相稽參紀元授爵繙

四三有句讀時正苦索無形象處偏快譚我不識字嘗

竊聞諸公頗足張其軍君到小滄浪亭上千七百種策

殊勲庚寅甲申辨年月曷不師聖疑且闕點畫樸茂交

淵深且與窮年共屹屹請看爲父策伏昏朋友大義千

秋存能使君王亦褒獎定無諛詞來墓門祖龍陵寢呂

雉豕頌德稱功定泉湧赤眉掘盡童兒燒不剩偏旁備

一種乃知呵護天無私孫羊姓氏星日垂好藉廿行初

榻本光芒百丈傳一時爲君長短吟未成座間時有環  
珮聲黃葉林乾白雁冷七十三泉泉水清

時相香寓歸潭西精舍

去携來旅館下月色橫窗已半夜不能攷据徒多言黃

圖孫頷愧相謝

小松爲作新甫得碑圖淵如爲題小寶晉齋

### 題畢蘇橋詩稿

絕不乞人憐詩成萬口傳士非窮徹骨句豈好如仙獨  
對荒村月時聽古寺泉竟爲何處客惆悵夕陽天

和軒蔚起招陪雪泉讌飲呈鄭貫夫

三日不飲酒面上塵俗撲一斗五日不吟詩市井空作

牛馬走伯倫荷鍾真達人長吉奚囊得未有生恨不與  
二子並未能千古稱尚友竭來雪泉泉水香有客精光  
動戶牖門外問字短轅多堦下絜瓶重釀厚朝來仙侶  
移行厨膩飴甘逐大車右不醉不誦歸來辭既醉狂歌  
擊瓦缶是時風日如春晴庭餘黃葉池餘鰕君家三絕  
老鄭虔柳我家長城國無耦春船舊交新知同盡歡好  
畫好詩在人口况是李侯佳句多弟子時時恥王後璋  
刺史及楊煩君高唱雪泉篇屬和行看及千首

哭王汝玉孝廉

從春船集中得知  
汝玉於夏間物故

死生千里不相知驚見春舡卷底詩造物生才原自少  
科名銷恨永無期鄉園尙寄平安字吾黨猶存夢寐疑  
未卜何人歸旅櫬桑乾河畔晚風悲

題祥麟圖爲東萊姜生桂林

一夕光芒動天地千里百里客麕至老牛脩產麒麟兒  
此是人間未有事麒麟不畜公卿家高明甲第連雲霞  
荒村寂寞門巷小牛宮一把茅蓋遮癡婦癡童識雞狗  
瞥見舉家盡駭走孝穆無人董龍多紛紛徃質百歲叟  
是爲嘉慶二年冬歲在丁巳月黃鍾其地馬哥莊治平

度人維侯氏何容容一時過客推姜生丹青顧陸非虛  
名橐中有筆袖有手街前倚馬橫圖成頭上童然少獨  
角難定似龍還似鹿自是初生未長成想見巖巖亦不  
觸搖曳一尾如麈長滿身鱗甲堅有光大小方圓狀非  
一鱗間圍繞毛赭黃嗟我後來已三載賴有姜生健筆  
在今朝見畫如見麟不恨河洛匿精彩怪君要我強作  
詩生祥下瑞難預知忽憶仙人太無理鳥爪擘脯高會  
時推案不覺怒如虎欲將饕餮試鉞斧尋常家著狼藉  
多孔甲醢龍尚不武君不見駿馬之骨來千金麒麟之

度無處尋黃帝郊天用大樂元端待聽逢逢音

題瑤泉圖

吳子晨相見出圖置漆几四座共傳觀云是子徐子脾  
睨坡陀上下俯瑤泉水瑤泉清且幽徐子頽而美細辨  
誰所作南薌逞厥技乍覺生面開幾欲歎觀止其後又  
一圖坐嘯林泉裏悠悠水澄泓遠遠山窈窕自謂似者  
神昨非今日是我聞昔道子古佛畫重累何嘗眼見佛  
畫中叅微旨卽其畫變相地獄豈曾企能令逃者悟涕  
泣垂不已神似非形似此語良可喜然如淩烟閣功臣



紀姓氏又如瀛洲客一一辨爵齒丹青著實際不能懸  
虛誕舍神形何貴離形神何倚若但取形似續紛有衆  
史固未兩其口亦未三其耳目橫鼻復直幾人識生死  
若但取神似謂得畫家理何不古圖中往擇一佳士云  
此卽是我必費半幅紙狡獪神仙爲欺人英雄以多方  
書滿車是非桶沒底兩忘適於道在此不在彼請質圖  
中人誰譽又誰毀

題澗上章堂圖

蒼茫雲物日銷魂避客幽居澗上村誰似中丞能下土

如何不許到衡門

列岫羣巒揖大樵古籐修竹認前朝入山知是江西客  
拄杖行遇第二橋

後祥麟圖

豺狼匝地熊羆多磨牙乳虎依巖阿大野風吹落日暗  
牛羊不敢輕寢訛何人綠章達帝右上帝躊躇遣仁獸  
彩雲五色紛輪囷長成軼材侍文囿羣厖無故聲咭咭  
不知天上來麒麟村婦市兒走相告停車大息行路人  
作圖如繪古賢相伊傅呂周共頡頏題詩欲續封禪書

河馬洛龜齊相望世人見少怪固宜祥與不祥各有時  
西狩莫再紀魯史我欲棄之觀鳳儀

題竹根三贊詩畫冊後

木谷先生僧再世金石刻畫小游戲一朝竹根見如來  
不覺五體齊投地天上地下獨尊者願與此君爲近侍  
妙相如睹黃金身綺語難書貝多字同時晴村及筠圃  
占得蒼筤象無二歲星壽星天上來共八清淨三昧地  
三壽作朋語解頤覃溪使者更好事尙嫌衣襟杖履間  
筆墨微茫點畫細特倩兩峰子羅子細榻硬黃別位置

以寫鬼手寫仙佛好趣惡趣各極至生日不須供檀旃  
七十三泉遠相遺世間一切草芥耳土偶桃梗何足識  
潭西精舍老同龕無端去作永平吏山僧秘密人難窺  
壞色衣衫同在笥秬香孝廉持示我妙絕未敢輕詫異  
人生本如蜉蝣寄何況南極相擬議大隱直節猶可希  
不爾逃禪亦言志七尺鬚眉男兒身奔走風塵豈不媿  
仙耶佛耶我何知刊盡枝葉見本始祇惜爛煮喫不得  
詎若竹林日日醉醉後慷慨報恩仇繡絲鑄金差快意

題高司寇畫牛

甲子

落日驅牛返言涉清溪流溪流有深淺牛背穩如舟兩  
角巍巍目炯炯腹已出水鼻未浮老嫗携兒遠相望不  
爲牧人生百憂牧兒挾策只虛喝幾曾輕易鞭吾牛赤  
足雙雙不著襪感波跳浪翻優游須與茅屋得歸臥溪  
流東下何悠悠閒官垂老履危險淇濤曾與馳驂騶對  
此能勿長太息有人岸上笑不休未知司寇作此畫身  
爲牛喜爲牛羞試看一犢更暇豫當欄不肯輕出頭

聞吳和軒有贈鏡圖竟不相示寄詩調之

朝朝攬鏡恨如何才著輕塵手自磨一代紅顏知有幾

長門照見美人多

終日思春又怨春  
飛花落絮總傷神  
蛾眉畫就休相祀  
省得憐他鏡裏人

鴛鴦夢散各飛還  
帶笑開奩置袖間  
此物無情如止水  
不曾畱駐可兒顏

絕代風流杜牧之  
圖成不許外人窺  
應忘白髮多情甚  
司馬青衫淚濕時

寄庵詩鈔八

乙丑

寧州劉大紳

池上

暫爲池上客  
憑眺有餘情  
雨足蒼苔澁  
風微細浪平  
過橋留杖影  
隔水送書聲  
所愧無佳句  
前宵夢未成

和張南岡明府韻

濟水清清萬古流  
濟南人物亦千秋  
每因薄宦思前輩  
恐有虛名落後頭  
詞客綠蘿餘舊館  
詩家白雪剩高樓  
風淪月倚無多地  
爲問青雲許附不

處處精光燦魯瑱鄙人自笑褐衣麤陶潛事業歸三逕  
范蠡功名在五湖冠劍本非麟閣選風流第有草堂圖  
衆中得見張平子又是齊州何易于

一代文章付作家高門人物自清華暫教中縣綰青綬  
尙許深宮宣白麻萬里長風曾破浪十年春雨只栽花  
傳聞絕島登臨後脫帽從容去品茶

輶車不見記三年又結棘闥文字緣瑞作麒麟知孝穆  
劣猶虎豹識僧虔衙杯共醉青州酒擊鉢同分蜀國箋  
君健我衰何所似上灘船遇下灘船



題瑤山睹光圖爲李刺史

有目無由自見面付與揚州銅百鍊開鑿白月臨窻虛  
鼻直眉橫已悉見誰知大冶傾洪爐瑤山山頂光景殊  
攝取羣生妙相底謂有非有無非無連臂倚肩齊拍手  
歡喜今得未曾有不見他人見已身此理將從何處叩  
或言佛氏原多情現身說法渾難名或言如泡如幻影  
世間一切由心生瑤山爲佛入定處明鏡高懸菩提樹  
世人尙有我見存指點虛無是歸路榮華富貴誰千年  
大家圓首空雲烟悟到本來無一物光中閃爍猶糾纏

珥峰先生早知此未及懸車徑去矣芒鞋竹杖深山中  
飽看佛光六月裏佛光如鏡朝朝開可曾背鑄菱花來  
待繡鏡囊貯鏡面冰綃萬丈無人裁

答小山樵士

君家太史天上人神仙態度離風塵手闢林園二十載  
門前有客闔者嗔人世無由睹公面詞翰流傳競相羨  
黃河岸上千桃花一葉輕舟去似箭才華只有令弟如  
徵詩題畫時相於耳底姓氏聞之久思君又及三年餘  
老病閉門白晝臥長佩高冠謂懶惰夢中剝啄聲不休

未及披衣客入座故交書附新交詩徐徐懷袖出讀之  
聲價三唐有其亞縱橫百代無復疑我今瑣瑣學格調  
移宮換羽默自笑忽聞雲外鷓鴣鳴恰見牖閒日月照  
遂令嫫母衣錦衣口脂面澤生光輝可惜若耶好女子  
負薪落日山中歸竊取虛名枉太息投贈鴻文轉心惻  
巴人下里歌何爲白雪陽春和不得他日若過秋水亭  
急繩二陸與雙丁定有好句遙酬唱一緘寄到琴山青

枕上口占

牆角鷄聲雨後驕殘燈在壁恨迢迢分明一夜還鄉夢

身到昆明小板橋

孫弇山泥鴻錄題詞

黑月沈沈鬼夜哭一穗紅燈照老屋十二萬年無終窮  
魯史絕筆人不續盧初乘傳祇浪游奇聞異說堆山邱  
道術幾爲天下裂瓜分白馬并青牛誰郭百川到東海  
收拾人心一綫在雕龍繡虎媚倡優旌直誅諛固有待  
孫卿慧劍藏胸中青霄夜夜飛長虹孫卿心花入筆底  
無邊爛漫吹春風忠義肝膽香魂魄口講與人指復畫  
佞臣賊子負心人攝向行間寸寸磔傳者迷悟聞者悲

垂涕告語羞前爲華袞缺鉞分一字殺青不愧兼兩時  
山海荒怪十洲頗齊諧搜神秉畀火孔門孟宅堯舜牆  
盡挾藩籬開關鎖空山自道非著書高文豈是鴻泥如  
四海奔波快先睹朝麟鳳來遊初

大熱

火聚閻浮真可哀日長揮扇欲千回正如我意惟風至  
不近人情是客來黑白難消枰上子升沈且盡掌中杯  
何時白雪高樓底去弔千秋作賦才

聽蟬懷蘇橋

此間非故土久住爲蟬聲能潔豈微物不吟無善鳴秋  
陰到庭樹曉雨入山城惟有孤遊客同餘作賦情

留別東遊諸先生

出山成白首此去是初心主組君恩重門閭母望深  
清風過大野涼雨入遙岑鴻鴈行中斷淒然淚濕襟  
豈少別離恨齊州難與留千場縱詩酒六度閱春秋老  
境全無用窮官正合休早依親膝下凍餒復何憂  
到家身尙在卽與報平安或有途中詠還求醉後看人  
前休說好歸去本無干免得然疑作閑居歲月寬

所恨雲山隔千重復萬重欲飛無兩翼相仗只孤筇夫  
免長行路何時老作農最難消遣處落日遠林鐘

題師立夫詩集後

師氏子真才子天何以生何以死生前空有驚人詩不  
爲世用等敝屣死也未及子安年較多長吉一歲耳人  
言太白仙而天長吉鬼之仙天耶鬼耶仙耶吾何知第  
見精光弈弈牛斗邊排雲挾漢森相聯石渠秘閣闔無  
色蒼蒼何不留此賢與才子才不與壽謂天非薄亦非  
厚嗚呼此意誰復知若翁之才雄一時才子之才又如

茲斗大趙州何能容二師才子乘虬天上去人間老淚  
洒何處風雨蕭蕭白楊樹

七月十日王秋水同孟柳谷來濟南作別兼携石  
子真詩至

別淚先秋急交情到老真悞傳歸信日便作送行人長  
路有風雨荒村無主賓聯吟驢背上幸與孟家鄰  
新詩出懷袖座上客爲傾卽此別離意不渝金石盟更  
聞籠水岸復有褐衣生寄到一雙鯉中含無限情

送趙理義之章邱



不是栖栖客相携好問津偏當欲去日忽作送行人  
贈圖書破歸傳笑語真休教淹滯久早慰倚門親

同宋步武畢蘇橋王秋水鹿雪樵胡乙垣耿希尹  
王勉餘拜李滄溟先生墓下

斑剝殘碑長蘚苔九九松栢未曾栽同時屈膝皆吾輩  
異代傾心是此才不到秋風先有恨如聞旅雁亦生哀  
九泉留得詩人骨誰禁牛羊塚上來

感宣城爲滄溟立碑事賦詩一首

宣城作事亦風流車馬來臨土一邱祇此青山餘舊塚

正如白雪剩高樓才空百代無門戶生在同時定從遊  
其說精神通夢寐靈旗颯颯下城頭

哭趙覺莊太史

竟虛登岱約蕭寺寄銘旌藥自憑醫悞才難與命爭妻  
孀不知病朋友尙求生魂魄思鄉縣迢迢萬里程

題畫

一官淪落向天涯楓葉蕭蕭荻有花千古傷心白司馬  
斷腸不爲聽琵琶

鄭柳田爲作歸雲圖

謂雲不肯出何以霖雨優渥而霑足謂雲不肯歸何嘗  
功成復向山外飛名山能興亦能容出如行義歸明農  
世人不向山中住第見紛紛從龍去藤鞋竹杖君能閒  
才知飛去隨飛還作圖贈我我羞死幾度蒼黃出山矣  
昔日少年今白頭從今穩臥山中樓

八月十二日夜同畢蘇橋王秋水陳鶴峰胡乙垣  
耿希尹聽酌突泉

行與仙源近風泉隔院鳴居山知此意入夜失羣聲殿  
角雲初散橋頭月正明薄涼還久坐同有別離情

次日余南歸

宿東臯園

南望鴻雁飛單車向長路名園傍城隅是我舊遊處  
此夢亦甘明月到前樹念我園中人昨日長安去

出阜城里

清曉出阜城言宿劉家口道旁送行人皤皤黃髮叟  
雜然携壺尊勸我且飲酒面目盡相知姓名忘誰某  
復有垂髫人年數方八九跪拜無儀文笑隨父兄後  
昔我當官日此輩尙未有去此十七年歲月亦已久  
自愧無才能感汝意良厚紛紛前致詞問我記憶否  
公昔拙催科

安眠到雞狗堤上無丁夫牛車糞田畝此事誰能忘此  
碑當不朽我聞慚且悲誰非民父母黃河今安瀾龍蛇  
不出走去去從此辭爲折道旁柳

韋映輝石鐵人送至周家口賦別鐵人

露冷霜寒風氣清誰家千里送人行窮官寂寞還鄉日  
舊友艱難祖道情曠野同車聽雁唳荒村共枕待雞鳴  
明朝別後雲山遠兩地相思夢不成

別映輝

志士憐衰朽良朋惜別離壯年難再得遠道苦相思及

此河千日還如漢水湄  
蕭條歸故里子意幾人知

早起同映輝鐵人

昨日驅車時雞鳴苦不早  
中庭看河影徘徊待天曉  
今夜孤燈前並坐述懷抱  
常恐雞一鳴出門卽長道

登黃鶴樓

誰憐金馬碧雞客  
白首重登黃鶴樓  
飄渺仙風自終古  
縱橫詩膽亦千秋  
凌雲酒氣銷餘恨  
裂石笛聲散遠愁  
爲問無情江漢水  
年年載得幾歸舟

江晚

大江沈落日孤客汎輕舟水闊疑無路風寒未可留前  
帆遠相失短棹獨含愁安得騎黃鶴重登昨日樓

岳陽樓上望洞庭湖

岳陽樓上又登臨渺渺君山湘水深不辨東西看日月  
只疑天地聽浮沈神祠鴉影逐人至帝子瑟聲何處尋  
憑仗魚龍知客恨長風送過洞庭陰

由岳州發君山

莫問停舟何處村布帆無恙卽君恩離騷讀罷人誰識  
斑竹深深盡淚痕

泊君山下

繫纜君山下洞庭何渺茫  
秋風吹木落夜雨入船涼  
遠客依孤僕歸心到故鄉  
誰能如水鳥一夢兩相忘

君山阻風謁二妃廟

不是緣風悞空傳帝子靈  
濤聲到岸盡山勢入湖青  
錦瑟有時鼓大魚無敢聽  
雲旗降北渚風雨夜冥冥

過洞庭湖

伏枕思鄉縣篷船難未鳴  
忽聞鄰舟語知是風色平  
帆檣一時舉櫂楫齊相爭  
急起呼舟子同向西湖行  
銅鉦



雜爆竹隱隱雌雷聲此日非昨日不爲魚龍驚君山頂  
刻失何況岳陽城洞庭新熟穩官舟之犧牲長歌九十  
字庶以酬神明

晚行小溪中

貪看晚霞秋水濱漁郎笑我是知津平生不敢爭先路  
歸去輕舟亦讓人

連日大風

風聲何處辨雄雌不爲孤舟住少時湖上青山猶在眼  
尊前白髮儘堪悲忘情水鳥隨波去喜事江豚逐浪吹

自計宦囊蕭索甚神龜出沒早應知

江上見新月

久行忘時節寄命江上舟忽見新生月纖纖又如鉤  
孟冬知已至年華去如流老母携弱孫此時倚高樓含淚  
數歸期胡爲尙淹留江風不稱意江水不消憂此心託  
明月爲照浣江頭

行吟

不盡沅湘水魚龍試怒濤破帆風力淺危石浪聲高牽  
纜人無色停舟客亦勞行吟今兩月遊興不能豪

夜行

天吹烟深處鴉飛月上時江寒人不寐今夜泊舟遲

對月作

船頭櫓聲搖不歇推窗已見江心月此時愁人正思家  
何處清笳又競發江風無情不相親江月夜夜常照人  
可能行到江盡處高樓恰好月滿輪倚樓笑看江東去  
愁心不繫江邊樹明朝早助一帆風江神有知聽我語

風帆崖

年年無恙楚江東掩映霜花十里紅可惜灘頭空百尺

不曾輕試半帆風

江上山

一石成一山一山高百丈纍纍千里間各不相依傍從  
來畫圖中未見此形狀想當開闢初經營得巧匠絕少  
斧鑿痕有此獨立樣萬古無傾崩孤舟快下上阿諛人  
世多於此得心嚮

江上見燕子

營巢北岸燕成羣愛此東南日氣曛不待桃花三月暮  
雙雙剪破一溪雲

鷄鳴關

一時法令太分明峻嶺嵒我禁夜行還是西南風氣古  
出關不肯學鷄鳴

清溪城外見拾苔水中者問之以代絮也感而賦詩  
洲邊不種木棉花俯拾苔紋向水涯世上無衣人不少  
貂裘盡入五侯家

將抵鎮遠

來朝棄舟楫策馬向南還只恐揚鞭夢猶驚繫纜灣居  
人苗漢雜景物雪梅間屈指千餘里雲中見故山

至石虬亭

黔道難於蜀道難吾徒今日得平安入門先喜亭如故  
持酒重將石細看風雨遙遙山路近鄉村簇簇土音懽  
何人爲語關前吏萬里歸來一冷官

金衡宇歐陽譽全朱禹甸自鎮遠相伴至板橋驛  
衡宇復送至呈貢爲長句贈之

黔雨滇風到板橋臨岐孤客又魂銷宦貧不爲金銀累  
年老還愁道路遙出示肺肝傾意氣指揮僕馬入雲霄  
匆匆莫便揚鞭去尊酒燈前慰寂寥

至晉寧再贈衡字

宿呈貢無旅資衡字解玉環爲質

少年意氣薄雲間伴送衰翁萬里還  
雁影依依來曠野雞聲喔喔度嚴關  
每當岐路圓金勒時向荒城解玉環  
同有慈親倚門望明朝各自認家山

### 除夕

歡然此除夕僮僕亦相親  
閱盡殘年日歸來萬里人家  
庭娛老景山水置閒身  
夙構椒花頌明朝獻歲新

寄庵先生詩鈔八卷新城張荻石孝廉爲序名論卓然  
矣茲示以續鈔十卷如禹鼎湯盤騰輝案上黃鐘大呂  
振響人間端反覆沈吟不禁狂喜溯文章於庾信老去  
更成緬聲韻於陶潛歸來不廢誠以丹爲丸還而見寶  
劍因萬灌以稱神也 先生自乙丑年抽簪旋里心於  
宦淡味在詩腴無十萬以買鄰墓二分而邀月卜築則  
堂開奉母殖基而樓號抱孫環以紅樹之殷天雜以青  
苔之撲地桑麻如畫雞犬皆仙於斯時也逸興颺飛藻  
思泉湧本敦厚和平之性發溫文爾雅之詞焉若夫素



愛游觀性耽金石著謝家之屐玩水娛山携叔夜之琴  
吟風嘯月小橋半坡之際有石皆題古籐紅樹之間無  
甚不詠則又放懷高遠寄意遙深者也至其經涉川原  
徘徊往古或揮綆淚泣忠烈之孤魂或酌蘭漿酌英雄  
之毅魄靡不再三躑躅慷慨悲歌蓋素所蓄積然矣癸  
酉承聘五華敷文三迤重過甲子已過伯玉之行年不  
守庚申更見宗元之卓識聞傳經於伏勝負笈偏多思  
好學之武公祛衣者衆每拈一藝爭推老子婆婆偶有  
小吟亦羨是翁矍鑠蓋先生根柢平詩書禮樂之奧

涵育乎喜怒哀樂之精閱歷乎顯晦升沈之途深識乎  
紛紜蕃變之故於茲六十餘年矣是以德隨年以俱高  
詩以老而愈健也昔人覘伯淳人品但稱良玉精金接  
茂叔胸襟僅擬光風霽月

端讀

先生詩亦云

受業門生鶴陽奚品端謹跋